



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 400/prot.
18

Tiranë, më 13.09.2023

VENDIM

Nr. 1012, Datë 13.09.2023

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË VRUMONA B.V. NGA SHOQËRIA ROYAL UNIBREW A/S NËPËRMJET SHOQËRISË COMPANY OF JUNE 2023 B.V.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 13.09.2023, shqyrtoi çështjen me:

Objekti: Autorizimi i përqendrimit të realizuar nëpërmjet përfutimit të kontrollit të shoqërisë Vrumona B.V. nga shoqëria Royal Unibrew A/S nëpërmjet shoqërisë Company of June 2023 B.V.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfutimit të kontrollit të shoqërisë Vrumona B.V. nga shoqëria Royal Unibrew A/S nëpërmjet shoqërisë Company of June 2023 B.V.,

VËREN SE :

I. Palët në transaksion dhe procedura

Pranë Autoritetit të Konkurrencës u depozitua njoftimi mbi përfitim e kontrollit të shoqërisë Vrumona B.V. nga shoqëria Royal Unibrew A/S nëpërmjet shoqërisë Company of June 2023 B.V.

Referuar dokumentit “Marrëveshje shitblerje”, të nënshkruar më datë 03 korrik 2023, palët në marrëveshje janë:

Pala blerëse: Company of June 2023 B.V. është një shoqëri holding, me formë juridike të shoqërisë private me përgjegjësi të kufizuar, e themeluar sipas legjislacionit holandez, si një ndërmarrje me qëllime të veçanta (SPV), për të vepruar si palë blerëse në këtë përqendrim.

Blerësi mëmë/Garantuesi: Royal Unibrew A/S është një shoqëri aksionere, e themeluar sipas legjislacionit danez. Royal Unibrew A/S është shoqëria mëmë e grupit të shoqërive Royal Unibrew Group, për shitjen e pijeve të ndryshme, me portofol solid të markave lokale në tregjet kryesore në rajonin nordik, vendet baltike, Itali, Francë dhe Kanada. Shoqëria Royal Unibrew A/S do të jetë garantuesi i SPV-së në këtë transaksion.

Royal Unibrew A/S, nuk ka asnjë filial në Shqipëri.

Pala shitëse: Heineken Nederlands Beheer B.V. është një shoqëri private me përgjegjësi të kufizuar, e regjistruar sipas legjislacionit holandez, me aktivitet tregtar: shoqëri mbajtëse aksionesh.

Heineken Nederlands Beheer B.V. nuk ka filiale ose prezencë në Shqipëri.

Shoqëria Target: Vrumona B.V. është një shoqëri private me përgjegjësi të kufizuar, e themeluar sipas legjislacionit holandez, me aktivitet tregtar: prodhim i pijeve joalkoolike; prodhim i ujërave minerale dhe ujërave të tjerë të ambalazhuar; prodhimi i lëngjeve të frutave dhe perimeve; tregtia me shumicë e pijeve (jo produkte qumështi).

Target zotëron 100% filialin Energie Conversie Maatschappij Bunnik B.V.

Energie Conversie Maatschappij Bunnik B.V. është një shoqëri private me përgjegjësi të kufizuar, e themeluar sipas legjislacionit holandez, me objekt aktiviteti në fushën e Transportit, Komunikimeve, Shërbimeve Elektrike, Gazit, Sanitareve dhe Shërbimeve elektrike.

II. Përqendrimi

Ndërmjet shoqërisë Heineken Nederlands Beheer B.V. (shitësi), shoqërisë Company of June 2023 B.V. (blerësi) dhe shoqërisë Royal Unibrew A/S (blerësi mëmë), është lidhur “Marrëveshje shitblerje”, datë 03 korrik 2023.

Referuar kësaj Marrëveshjeje shitblerjeje, shitësi Heineken Nederlands Beheer B.V. dëshiron t'i shesë aksionet blerësit dhe blerësi, Company of June 2023 B.V. dëshiron t'i blejë të gjitha aksionet nga shitësi, në varësi të kushteve dhe termave të përcaktuara në këtë Marrëveshje.

Blerësi Mëmë është i gatshëm dhe në gjendje të garantojë detyrimet dhe angazhimet e blerësit sipas kësaj Kontrate.

Pas përfundimit, shoqëria Heineken Nederlands Beheer B.V. do t'i transferojë shoqërisë Company of June 2023 B.V. aksionet pa ndonjë barrë, me anë të ekzekutimit të Aktit të Transferimit, në përputhje me Marrëveshjen.

Referuar dokumentacionit të depozituar, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 "Për mbrojtjen e konkurrencës", i cili është objekt autorizimi nga Komisioni i Konkurrencës.

III. Analiza e konkurrencës

Në zbatim të nenit 3, pika 7, të ligjit nr. 9121, datë 28.07.2003 "Për mbrojtjen e konkurrencës", si edhe Udhëzimit nr.76, datë 07.04.2008 "Për përcaktimin e tregut përkatës", treg përkatës do të konsiderohet tregu i prodhimit dhe tregtimit të pijeve freskuese, por duke qenë se transaksioni nuk do të ketë asnjë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është përftimi i kontrollit të shoqërisë Vrumona B.V. nga Royal Unibrew A/S nëpërmjet shoqërisë Company of June 2023 B.V.

Company of June 2023 B.V. është një ndërmarrje me qëllime të veçanta për realizimin e këtij transaksioni, e zotëruar 100% nga Royal Unibrew A/S.

Royal Unibrew A/S është një shoqëri aksionare, aktive në shitjen e pijeve të ndryshme, përfshirë birrën, pijet me malt, pijet freskuese, pijet energjike, ujin, verën, etj. në tregjet kryesore në rajonin nordik, vendet baltike, Itali, Francë dhe Kanada.

Royal Unibrew Group nuk ka filiale në Shqipëri, por ka realizuar shitje nëpërmjet një distributori të kontraktuar nga filiali i saj italian.

Target Vrumona B.V. është një shoqëri aktive në prodhimin e pijeve joalkoolike; prodhimi i ujërave minerale dhe ujërave të tjerë të ambalazhuar; prodhimi i lëngjeve të frutave dhe perimeve dhe tregtia me shumicë e tyre. Vrumona B.V. nuk kryen veprimtari eksporti. Transaksioni do të realizohet në Holandë dhe nuk do të ketë ndikim të drejtpërdrejtë apo të tërthortë në tregun shqiptar.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 "Për mbrojtjen e konkurrencës",


VENDOSI:

1. Të autorizojë përqendrimin e realizuar nëpërmjet përfimit të kontrollit të shoqërisë Vrumona B.V. nga shoqëria Royal Unibrew A/S nëpërmjet shoqërisë Company of June 2023 B.V.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURENCËS


Leida MATJA


Zv/Kryetar


Rezana KONOMI


Anëtar

Adriana BERBERI


Anëtar

Durim KRAJA


Anëtar

